

四庫全書

史部

欽定四庫全書

史部

文獻通考卷九十八

詳校官內閣學士臣尹壯圖

編修臣程嘉謨覆勘

覆校官庶吉士臣陳墉

校對官中書臣高中

謄錄舉人臣薛炳文

欽定四庫全書

文獻通考卷九十七

鄱陽馬端臨貴與著

宗廟考七

祭祀時享

漢惠帝時叔孫通曰古者有春嘗果方今櫻桃熟可獻
遂獻宗廟諸果之獻由此興

孝景帝元年詔高廟酎

張晏曰正月旦作酒八月成名
曰酎酎之言純也至武帝時因

八月嘗酎會諸侯廟中出金助祭所謂酎金也師古曰酎三重釀醇酒也故以薦宗廟酎直救反秦武

德文始五行之舞

孟康曰武德高祖所作也文始舜舞也五行周舞也武德者其舞人執干

戚文始舞執羽籥五行舞冠冕衣服法五行色見禮樂志

孝惠廟酎奏文始五行之

舞爲孝文廟爲昭德之舞

武帝元鼎五年九月列侯坐獻黃金酎祭宗廟不如法

奪爵者百六人

如淳曰漢儀注諸侯王歲以戶口酎黃金於漢廟皇帝臨受獻金金少少不如

斤兩色惡王削縣侯免國

宣帝本始二年尊孝武廟爲世宗廟奏盛德文始五行

之舞

漢時宗廟在郡國者六十八合百六十七所

六十八者郡國之數

百六十七者宗廟之數

而京師自高祖至宣帝與太上皇悼皇考

各自居陵旁立廟并爲百七十六又園中各有寢便殿
日祭於寢月祭於廟時祭於便殿寢日四上食廟歲二

十五祠

如淳曰月祭朔望加臘爲二十五晉灼曰漢儀注宗廟一歲十二祠五月嘗麥六月七月三伏

立秋軀婁又嘗菜八月先夕饋飧皆一太牢耐祭用九
太牢十月嘗稻又飲烝二太牢十一月嘗十二月臘二
太牢又每月一太牢如閏加一祀與此
上十二爲二十五祠師古曰晉說是也
便殿歲四祠又

欽定四庫全書

文獻通考

二

月一游衣冠而昭靈后武哀王昭哀后孝文太后孝昭
太后衛思后戾太子戾后各有寢園與諸帝合凡三十
所一歲祠上食二萬四千四百五十五用衛士四萬五
千一百二十九人祝宰樂人萬二千一百四十七人養
犧牲卒不在數中至元帝時貢禹奏言古者天子七廟
今孝惠孝景廟皆親盡宜毀又郡國廟不應古禮宜正
定天子是其議未及施行而禹卒永光四年乃下詔罷

郡國廟

詳見宗廟門

既罷郡國廟議者又以爲清廟之詩言交神之禮無
不清靜今衣冠出游有車騎之衆風雨之氣非所謂
清靜也祭不欲數數則瀆瀆則不敬宜復古禮四時
祭於廟諸寢園日月間祀皆可勿復修上亦不改也
漢舊儀宗廟八月飲酎用九太牢皇帝侍祠 寢廟
月一太牢四上食十二月一太牢餽食與閏月十三
嘗祠正月嘗薤又嘗羔六月嘗黍七月歲事八月嘗
酎特牛九月嘗鴈十月嘗稻十一月歲事又賽禱凡

正祠一歲二十二 原廟一歲十二祠有閏加一祠
皆用太牢月游衣冠以廟餽事之日歲凡十二祠立
秋糴婁又嘗麻八月先夕餽飧皆一太牢皇帝會諸
侯酎金廟中以上計儀設九賓陪位他祠無有十月
嘗稻又飲烝二太牢十一月嘗文臧未詳十二月臘二

太牢十二月擊牛飲酌無飯故先夕餽飧文帝所加
以正月日作酒八月成名曰酎酒 園廟一歲四祠
皆太牢七月歲事十二月歲事臘以亥日初歲椒酒

凡四祠皆太牢凡一歲太祠五十二小祠千一百

八月耐車駕夕牲牛以繡衣之皇帝暮親牲以鑑遂
取水於月以火燧取火於日爲明水火左袒以水沃
牛右肩手執鸞刀以切牛毛血薦之而卽更衣中侍
上熟行禮齋日四法食丈二尺拒按以陳三十六肉
六氣穀飯贊饗一人秩六百石主贊天子太祝令主
薦酒太宰令主饌陳太常主導贊丞舉廟中非法八
月諸侯王耐金助祭以九太牢用豚八百枚鉶羹三

百雞鳧鴈魚皆千枚賜中都官吏卒以下廟旁牛四十頭助供樂用三千四百二十八人祠立九旗於庭下功臣四十人食堂下西階南凡上堂上後房中婦子祠用禾稬長八尺廣八寸深四寸凡八十一祭御僕媵公祭於廟門外塾上用壺酒四脰骨藥西廂歌秦海龜龍舞武德文始五行

永光四年御史大夫貢禹奏罷祖宗皇后位座獨祭皇帝而已

漢興叔孫通因秦樂人制宗廟樂太祝迎神於廟門奏

嘉至

李奇曰嘉善也善神之至

猶古降神之樂也皇帝入廟門奏永

至以爲行步之節猶古采齊肆夏也乾豆上奏登歌

乾豆

脯羞之屬

獨上歌不以莞絃亂人聲欲在位者徧聞之猶古

清廟之歌也登歌再終下奏休成之樂

服虔曰叔孫通所奏作也

美

神明既享也皇帝就酒東廂坐定美禮已成也又有房

中祠樂高祖唐山夫人所作也

高帝姬也姓唐山

周有房中樂

至秦名曰壽人凡樂樂其所生禮不忘本高祖樂楚聲

故房中樂楚聲也至孝惠二年使樂府令夏侯寬備其
簫箏更名曰安世樂

安世房中歌十七章 大孝備矣一章八句 七始

華始一章八句 我定歷數一章八句 王侯秉德

一章七句 海內有姦一章八句 大海蕩蕩三章

六句 安其所一章八句 豐草萋萋一章八句 雷

震震一章十句 都荔遂芳一章十句 桂華一章

十句 美芳一章八句 嘉薦芳矣一章八句 皇

皇鴻明一章六句 浚則師德一章四句 孔容之

常一章八句 承帝明德一章八句

光武建武二年立高廟於洛陽四時祫祀高祖爲太祖
文帝爲太宗武帝爲世宗如舊餘帝四時春以正月夏
以四月秋以七月冬以十月及臘祠一歲中凡五祠

十九年詔曰以宗廟處所未定且祫祭高廟其成哀平
且祠祭長安故高廟其南陽春陵歲時各且因故園廟
祭祀園廟去太守治所遠者在所令長行太守事侍祠

於是雒陽高廟四時加祭孝宣孝元凡五帝其西廟成
哀平三帝主四時祭於故高廟東廟京兆尹侍祠冠衣
車服如太常祠陵廟之禮南頓君以上至節侯皆就園
廟在所郡縣侍祠

東漢制正月上丁祠南郊禮畢次北郊明堂高廟世祖
廟謂之五供安帝卽位竇太后猶臨朝七年正月初入
太廟齋七日庚戌謁宗廟率命婦羣妾相禮儀與皇帝
交獻親薦成禮而還因下詔曰凡供薦新味多非其節

或鬱養強熟或穿掘萌芽味無所至而夭折生長豈所以順時育物乎自今當奉祠陵廟及給御者皆須時乃

上凡所省二十三種

本紀永初五年劉珍言皇太后宜入廟與陛下交獻事下公卿僉如

珍言六年正月皇太后親祭於宗廟與皇帝交獻大臣命婦相禮儀

靈帝時京都四時所祭高廟五主世祖廟七主成帝三陵追后三陵凡牲用十八太牢

魏文帝黃初二年以洛京宗廟未成乃祠武帝於建始殿親執饋奠如家人禮

高堂隆云按舊典天子諸侯月有祭事其孟則四時之祭也三牲黍稷時物咸備其仲月季月皆薦新之祭也大夫以上將之以羔或加以犬而已不備三牲也士以豚庶人則唯其時宜魚鴈可也皆有黍稷禮器曰羔豚而祭百官皆足太牢而祭不必有餘羔豚則薦新之禮也太牢則時祭之禮也詩云四月其蚤獻羔祭韭周之四月則夏之二月也月令仲春天子乃獻羔開冰季春之月天子始乘舟薦鮪仲夏之月

天子乃嘗魚咸薦之寢廟此則仲月季月薦新之禮

也

蜀譙周禮祭集志曰天子之廟始祖及高曾祖考皆月朔加薦以像平生朔食也謂之月祭二祧之

廟無月祭也凡五穀新熟珍物新成天子以薦宗廟禮未薦不敢食新孝敬之道也其月朔薦及臘薦薦

新皆奠無尸故羣廟皆一朝之間盡畢

晉孝武帝太元十六年改作太廟遷神主於行廟設脯

醢之奠及新廟成神主還室又設脯醢之奠

餘見禘祫門

晉祠廟夕牲歌一首 祠廟迎送神歌一首 祠征

西將軍登歌一首 祠豫章府君登歌一首 祠潁

川府君登歌一首 祠京兆府君登歌一首 祠宣

皇帝登歌一首 祠景皇帝登歌一首 祠文皇帝

登歌一首 祠廟饗神歌二首

宋四時祭祀將祭必先夕牲皇帝散齋七日致齋三日
百官掌事者亦如之致齋之日御太極殿幄坐著絳紗
袍黑介幘通天金博山冠祠之日車駕出百官應齋從
駕留守填先置者各依宣攝從事上水一刻皇帝著平
冕龍袞服升金根車到廟北門理禮謁者各引太樂令

太常光祿勳三公等皆入在位皇帝降車入廟脫烏盥
及洗爵訖升殿初獻奠爵樂奏太祝令跪讀祝文訖進
奠神座前皇帝還本位博士引太尉亞獻訖謁者又引
光祿勳終獻皇帝不親祠則三公行事而太尉初獻太
常亞獻光祿勳終獻

齊武帝永明九年詔太廟四時之祭薦宣皇帝起麴餅
鴨臠孝皇后筍鴨卵高皇帝肉膾蘗羹昭皇后茗糲炙
魚皆所嗜也先時帝夢太祖謂已宋氏諸帝常在太廟

從我求食可別爲吾致祠乃命豫章王妃庾氏四時祠
二帝二后於清溪故宅牲牢服章皆如家人禮

司馬氏曰昔屈到嗜芰屈建去之以爲不可以私
欲干國之典況子爲天子而以庶人之禮祭其父
違禮甚矣衛成公欲祀相甯武子猶非之而況降
祀祖考於私室使庶婦尸之乎

梁武帝制春祠夏禘秋嘗冬烝并臘一歲凡五謂之時
祭

都令史王景之列自江左以郊廟祭祀帝已入齋百
姓尚哭以爲乖禮何佟之等奏按禮國門在臯門外
今之籬門是也今古殊制若禁凶服不得入籬門爲
太遠宜以六門爲斷詔曰六門之內士庶甚多四時
烝嘗俱斷其哭若有死者棺器須來旣許其大而不
許其細也致齋日宜去廟二百步斷哭四年何佟之
議按禮未祭一日大宗伯省牲鑊祭日之晨君親牽
牲麗碑後代有冒暗之防而人主猶必親奉故有夕

牲之禮頃代人君不復躬牽相承丹陽尹牽牲於古
無取宜依以未祭一日之暮太常省牲視鑊祭日之
晨使太尉牽牲出入也少牢饋食殺牲於廟門外今
儀注詣厨烹牲謂宜依舊帝可其奏佟之又曰鄭元
云天子諸侯之祭禮先有裸尸之事乃迎牲今儀注
乃至薦熟畢太祝方執珪瓚裸地違謬若斯又近代
人君不復躬行裸禮太尉既攝位實宜親執其事而
越使卑賤太祝甚乖舊典愚謂祭日之晨宜使太尉

先行裸獻乃後迎牲帝曰裸尸本使神有所附今既無尸裸將安設佟之曰如馬鄭之意裸雖獻尸而義在求神今雖無尸求神之義恐不可闕帝曰此本因尸以祀神今若無尸則宜立廣求之所裸義乃定佟之曰祭統云獻之屬莫重於裸今既存尸卒食之獻則裸鬯之求實不可闕又送神更裸經記無文宜依禮革奏未報而佟之卒後明山賓復申其理帝曰佟之既不復存宜從其議也自是始使太尉代太祝行

裸而又牽牲太常任昉又以未明九刻呈牲加又太尉裸酒三刻施饌間中五刻行儀不辦近者臨祭從事實以二更至未明三刻方辦明山賓議謂九刻已疑太早況二更非復祭旦帝曰夜半子時卽是晨始宜取三更省牲餘依儀注又有司以爲三牲或離杙依制埋瘞猪羊死則不埋請議其制司馬鑒等議以爲牲死則埋必在滌矣謂三牲在滌死悉宜埋帝從之五年明山賓議罇彝之制祭圖唯有三罇一曰象

樽周樽也二曰山罍夏樽也三曰著樽殷樽也徒有
彝名竟無其器直酌象樽之酒以爲珪瓚之實竊彝
裸重於獻不容共樽宜循彝器以備大典按禮器有
六彝春祠夏禘裸用雞彝鳥彝王以珪瓚初裸后以
璋瓚亞裸故春夏兩祭俱用三彝今古禮殊無復亞
裸止循其二春夏雞彝秋冬瓘彝庶禮物備也帝曰
雞是金禽亦主巽位但金火相伏用之通夏於義爲
疑山賓曰臣愚管不奉明詔則終年乖舛按鳥彝是

南方之物則主火位木生於火宜以鳥彘春夏兼用
帝從之七年舍人周捨以爲禮玉輅以祀金輅以賓
則祭日應乘玉輅詔下其議左丞孔休源議玉輅旣
有明文而儀注金輅當由宋齊乖謬宜依捨議帝從
之

天監十六年詔曰夫神無常饗饗於克誠所以西鄰禘
祭實受其福宗廟祭祀猶有牲牢無益至誠有累冥道
自今四時烝嘗外可量代八座議以大脯代一元大武

八座又奏旣停宰殺無復省牲之事請立省饌儀其衆官陪列並同省牲帝從之十月詔曰今雖無復牲腥猶有脯脩之類卽之幽明義爲未盡可更詳定悉薦時蔬左丞司馬筠等參議大餅代大脯餘悉用蔬菜帝從之又舍人朱异議二廟祀相承止有一鉶羹蓋祭祀之禮應有兩羹相承止於一鉶卽禮爲乖請加熬油蓴羹一鉶帝從之於是起至敬殿景陽臺立七廟座月中再設淨饌自是訖於臺城破諸廟遂不血食

陳制一歲五祠謂春夏秋冬臘也每祭共以太牢始祖以三牲首餘唯骨體而已

後魏孝文皇帝太和六年十一月將親祀七廟有司依禮具儀於是羣官議曰昔有虞親虔祖考來格殷宗躬謁介福攸降大魏七廟之祭依先朝舊事多不親謁今陛下孝誠發中思親執祀稽合古義禮之常典臣等謹按舊章并採漢魏故事撰祭服冠履牲牢之具罍洗簋簠俎豆之器百官助祭位次樂官節奏之引升降進退

之法別集爲親拜之儀制可於是帝乃親祭其後四時
常祀皆親之十六年詔曰夫四時享祀人子常道然祭
薦之禮貴賤不同故有邑之君祭以首時無田之士薦
以仲月況七廟之重而用中節者哉自頃烝嘗之禮頗
違舊義今將仰遵遠式以此孟月特禴於太廟但朝典
初改衆務殷湊無遑齊絜遂及於今又接神饗祖必須
擇日今禮律未宣有司或不知此可勅太常令尅日以
聞 又詔罷寒食饗

致堂胡氏曰四時之祀天子用孟月禮之正也若
寒食其始既不出於先王其節或跨乎仲季非天
子之所宜行也苟以爲祖宗常行有其舉之莫敢
廢也盍亦擇禮之中否而行之歟寒食之祀始於
晉人思介之推之焚死爲之不火食然則有天下
國家者以是日祀其祖考可謂不經之禮雖祖考
行之而未暇革今而革之去非以從是何不可之
有魏孝文斷然行之不膠者卓矣

北齊制春祠夏禴秋嘗冬烝皆以孟月凡四祭每祭室一太牢武成帝始以皇后亞獻河清中定令四時祭廟及元日廟庭並設庭燎二所

後周之制其四時祭各於其廟亦以皇后亞獻其義與北齊同所異者皇后亞獻訖后又薦加豆之遵其實菱芡芹藟兔醢豕宰終獻訖皇后親徹豆降還版位然後太祝徹焉

隋四時之祭各以太牢四時薦新於太廟有司行事而

不出神主祔祫之禮並准時享

唐四時各以孟月享太廟室各用一太牢若品物時新
堪進御者有司先送太常令尚食相知簡擇務令潔淨
仍以滋味與新物相宜者配之太常卿及少卿一人奉
薦太廟卿及少卿有故卽差五品以上攝有司行事不出神主仲春薦
冰亦如之

元宗開元十五年勅享宗廟差左右丞相尚書嗣王郡
王攝三公行事若人數不足通取諸司三品已上長官

自餘祭享差諸司長官及五品以下清官 二十三年
令今後有大祭宜差丞相特進少保少傅尚書賓客御
史大夫攝行 二十五年勅太廟每至五饗之日應攝
三公令中書門下及丞相師傅尚書御史大夫嗣王郡
王中揀擇德望高者通攝餘司不在差限 二十七年
制宗廟致敬必先於如在神人所依無取於非族其應
太廟五享宜於宗子及嗣郡王中揀擇有德望者令攝
三公行事其異姓官更不須差攝 二十三年正月敕

文宗廟致享務在豐潔禮經沿革必本人情籩豆之薦
或未能備宜令禮官學士詳議具奏太常卿韋紹奏宗
廟之奠每座籩豆各加十二又酒爵制度全小僅無一
合執持甚難請稍令廣大付尚書省集衆官詳議兵部
侍郎張均等議曰按舊制一升曰爵五升曰散禮器稱
宗廟之祭貴者獻以爵賤者獻以散此明貴小賤大示
之節儉豈可捨先王之遺法徇一時之所尚廢棄禮經
以從流俗裂冠毀冕將安用之太子賓客崔沔議曰祭

禮之興肇於太古人所飲食必先嚴獻未有火化茹毛
飲血則有毛血之薦未有麴蘖污樽杯飲則有元酒之
奠施及後王禮物漸備作爲酒醴伏其犧牲以致馨香
以極豐潔故有三牲八簋之盛五齊九獻之殷然以神
道至元可存而不能測也祭禮至敬可備而不可廢也
是以毛血腥爛元罇犧象靡不畢登於明薦矣然而薦
貴於新味不尚褻雖則備物猶存節制故禮云天之所
生地之所長苟可薦者莫不咸在備物之情也又曰三

牲之俎八簋之實美物備矣昆蟲之異草木之實陰陽之物備矣此節制之文也鉶俎籩豆簠簋樽壘實皆周人之時饌也其用通於燕享賓客而周公制禮咸與毛血元酒同薦於先晉中郎盧湛近古知禮者也著家祭禮皆晉時供食不復純用舊文然則當時飲食不可闕於祀祭明矣是變禮文而通其情也我國家由禮立訓因時制範考圖史於前典稽周漢之舊儀清廟時享禮饌畢陳用周制也而古式存焉圉寢上食時膳具設遵

漢法也而珍味極焉職貢來祭致遠物也有新必薦順
時令也苑囿之內躬稼所收蒐狩之時親發所中莫不
割鮮擇美薦而後食盡誠敬也若此至矣復何加焉但
當勅祭祭如神在無或簡怠增勗虔誠其進珍羞或時
鮮美考諸祠典有所漏畧皆詳擇名目編諸甲令因宜
而薦以類相從則新鮮肥濃盡在是矣不必加於籩豆
之數也至於祭器隨物所宜故太羹古食也盛於甗甑
古器也和羹時饌也盛於鉶鉶時器也亦有古饌而盛

於時器故毛血盛於盤元酒盛於罇未有薦時饌而追用古器者古質而今文便於事也雖加籩豆十二未足以盡天下美物而措諸清廟有兼倍之名近於侈矣又據漢書藝文志墨家之流出於清廟是以貴儉由此觀之清廟之不尚於奢舊矣太常所請恐未可行又稱酒爵全小須加廣大竊據禮文有小爲貴者獻以爵貴其小也小不及制敬而非禮是有司之失其傳也固可隨失釐正無待議而後革未知今制何所依准請兼詳

古式據文而行止曰享祀實思豐潔不應法制者亦不可用於是更令太常加品味韋縚又請每室加籩豆各六每四時異品以當時新果及珍羞同薦制可之又酌獻酒爵上令用藥汁一升合於古義而多少適中自是常依行焉 二十四年勅宗廟祭享籩豆宜加麋鹿鶉兔野雞等料夏秋供腊春冬供鮮仍令所司祭前十日具數申省准料令殿中供送 天寶三載詔頃四時有事於太廟兩京同日告享雖卜吉辰俱遵上日而義深

如在禮或有乖自今以後兩京宜各別擇吉日告享

五載詔祭神如在傳諸古訓以多爲貴著自禮經臍膾之儀蓋昔賢之尚質甘旨之品亦孝子之盡誠既切因心方資變禮其以後享太廟宜料外每室加常食一牙盤仍令所司務盡豐潔

貞元九年太常博士韋彤裴堪等議曰謹按禮經前代故事宗廟無朔望祭食之儀園寢則有朔望上食之禮國家自貞觀至開元修定禮令皆遵舊典至天

寶十一載三月初別令尚食朔望進食於太廟自太廟已下每室奠饗其進奠之禮內宮主之在臣禮司並無著令或云當時祀官王璵不本禮意妄推緣生之義請用宴私之饌此則可薦於寢宮而不可瀆於太廟一時之制久未變更至今論禮者貶王璵之議伏奉今月八日進止其朔望進食令宗正與太常計會辦集者謹按禮祭統云夫祭者非外至者也自中出生於心也休而奉之以禮由是牲牢有定制籩豆

有定數罄天生地長之物極昆蟲草木之異可薦者
莫不咸在先王以此饗宗廟交神明全孝敬也若生
之食飲膳羞八珍百品可嗜之饌隨好所遷美脆旨
甘皆爲褻味先王以此宴賓客接人情示慈惠也則
知薦饗宴會於文已殊聖人別之以異爲敬今若以
熟食薦太廟恐違禮本又祭義曰祭不欲數數則煩
煩則不敬祭不欲䟽䟽則怠怠則忘是故禘祠烝嘗
感時致饗此聖人俯就之中制也今園寢每月二祭

不爲䟽也太廟每歲五享不爲數也則人臣執事在
䟽數之間得盡其忠也若令牲牢俎豆之司更備膳
羞盤盂之饌朔日月半將以爲常環四時之中雜五
享之禮爲數既甚黷亦隨之雖曰不然臣不信也夫
聖王之制必師於古訓不敢以孝思之極而過於禮
不敢以肴膳之多而褻於味伏願陛下遵開元萬代
之則省天寶權宜之制園寢之上得極珍羞宗廟之
中請依正禮臣等忝司禮職敢罄愚衷上令宣示宰

臣等曰此禮已經先帝所定朕未敢遽有改移待更
商量期於允當至元和十四年太常丞王涇上疏請
去太廟上食曰伏以太廟之享籩豆牲牢三代之通
禮是貴誠之義園寢之奠改用常饌秦漢之權制乃
食味之道也今朔望上食於陵寢循秦漢故事斯爲
可矣若朔望上食於太廟豈非用嘗褻味而貴多品
乎且非禮所謂至敬不饗味而貴氣臭也況祭器不
設俎豆祭官不命三公執事者唯宮闈令與宗正卿

而已謂之上食可也安得以爲祭乎且時饗於太廟
有司攝事祝文曰孝曾孫皇帝臣某謹遣太尉臣名
敢昭告於高祖神堯皇帝祖妣太穆皇后竇氏時惟
孟春永懷罔極謹以一元大武柔毛剛鬣明粢薌合
饗其嘉蔬嘉薦醴齊敬修時饗以申追慕尚享此祝
詞也前饗七日質明太尉誓百官於尚書省曰某月
某日時享於太廟各揚其職不供其事國有常刑凡
陪饗之官散齋四日致齋三日然後乃可以爲祭也

宗廟之禮非敢擅議雖有知者其誰敢言故六十餘
年行之不廢今聖朝以弓矢既橐禮樂爲大故下百
僚使得詳議臣等以爲貞觀開元禮並無太廟上食
之禮以禮斷情罷之可也至若陵寢上食採國語禮
記日祭月祭之詞因秦漢之制循而存之以廣孝道
也如此則經義可據故事不遺大禮既明永息異論
中書舍人武衡議曰臣謹按開元禮太廟九室每
年唯五饗六告祭用牲牢俎豆而已劉歆祭義曰大

禘則終王壇墠則歲貢二祧則時享曾高則月祀祖
禴則日祭國語云王者日祭月享時類歲祀此則往
古之明徵國朝之顯據蓋日祭者薦新也言物有可
薦則薦之不必卜擇時也故叔孫通云古有嘗果今
櫻桃方熟可以爲獻由是惠帝取以薦宗廟是不卜
日矣當叔孫通之言且曰有嘗果足明古禮非漢制
也月享者告朔也論語子貢欲去告朔之餼羊孔子
以爲不可則告朔必具牲牢明矣春秋又譏閏月不

告朔猶朝於廟此則月祭殷周已降皆有之也薦園
寢者始於秦代漢氏因之而又改人君三年之制以
日易月喪紀既以二十七月而除則朔望奠酹不復
親執故既葬之後移之園陵又諸陵祠殿月遊衣冠
取象平生務從豐潔所以陵寢朔望上食與太廟日
祭月享本旨不同今王涇所引太廟同日時設祭以
爲越禮臣竊謂王涇但宜論太廟陵寢朔望奠祭可
廢之旨不當以用日時爲議何者漢宗廟園陵一百

六十七所郡園祠祝豈不與宗廟同日同時者乎在禮既祭於室又繹於祊蓋廣乎求神者也則宗廟陵寢嘗祔同時理固無害又韓臯引漢官儀古不墓祭臣據周禮冢人之職凡祭墓則爲之尸古亦墓祭但與漢家陵寢不同耳安得謂之無哉臣以爲陵廟近也親親也朔望奠獻尚潔務豐宜備常膳以廣孝也宗廟遠也尊尊也禘祫時享告朔薦新以崇古制以正禮也唯太廟望祭無所本據蓋異時有司因陵寢

有朔祭望點以爲宗廟亦合行之不知宗廟朔祭乃告朔也臣以爲宜罷此耳事竟不行

九載制曰承前有事宗廟皆稱告享茲乃臨下之辭頗虧尊上之義靜言斯稱殊未爲允自今以後每親告獻太清太微宮改爲朝獻有司行事爲薦獻親告享廟改爲朝拜有司行事爲薦享親巡陵改爲朝拜有司行事爲拜陵應緣諸事告宗廟者並改爲奏其郊天后土及諸祝文云敢昭告者並改爲敢昭薦

乾封元年詔曰每惟宗廟至敬虔誠

裸享而二等一奠惟有未安思革舊章用崇嚴配則自
今以後宗廟薦享爵及簋簠甄銅各宜用奠其餘牢饌
並依恒典貞元九年十一月九日謁太廟有勅至廟行
禮不得施褥蓋至敬之所自合履地而行南郊亦宜准
此

唐諸帝親饗廟

太宗二

貞觀元年正月十日 十七年四月十一日 親謁太廟謝承乾之過

蘇冕曰貞觀六年監察御史馬周上言陛下踐阼
以來宗廟之饗未曾親事遂使大唐一代之史不
書皇帝入廟之事將何以貽厥孫謀垂則末葉且

三年已親饗宗廟矣未知何事致此不同

高宗四

永徽三年正月十八日 乾封元年四月八日
總章元年十二月十九日 儀鳳二年正月

十四日

中宗一

神龍元年十一月六日

睿宗一

景雲三年正月一日

元宗七

先天元年十月四日 開元六年十月六日
十七年十一月四日 天寶元年二月十八日

六載正月十七日 十載正月九日 十三載二月八日

肅宗二

乾元元年四月十三日 元年建子月二十九日

代宗一

廣德二年二月二十七日

德宗四

建中元年正月四日
六年十一月七日

貞元元年十一月十日
九年十一月九日

憲宗一

元和二年正月

穆宗一

長慶元年十月

敬宗一

寶歷元年十月

文宗一

太和三年十一月

武宗二

會昌元年正月
五年正月

宣宗一

大中七年正月

懿宗一

咸通元年十一月

僖宗一

乾符二年十一月

昭宗二

龍紀元年十一月

天復元年四月

唐開元禮

皇帝時享於太廟儀

凡一歲五享謂四孟月及臘宗廟三年一祫以孟冬五年

一禘以孟夏及諸享攝事並附

齋戒

前享有司卜日如常儀皇帝散齋四日於別殿致齋三

日於太極殿服通天冠絳紗袍結珮並如園丘儀應享

官齋具序例儀

祫禘儀同

陳設

前享三日尚舍直長施大次廟東門之外道北南向尚

舍奉御鋪御座行宮設文武侍臣次於大次之後文官

在左武官在右俱南向設諸享官次於齋坊之內

攝事右校

清掃内外守官設享官公卿以下次於齋坊

九廟子孫於齋坊內近南西向

北上文官九品以上於齋坊之南東方南方蕃客又於

其南俱每等異位重行西向北上介公鄺公於廟西門之外近南武官七品以上於介公鄺公之南西方北方

朝集使於武官之南西方北方蕃客又於其南俱每等

異位重行東向北上

其褒聖侯於文官三品之下諸州使人分方各於朝集使之後攝事

無大次及九廟子孫以下

前享二日太樂令設宮懸之樂於廟庭如

圜丘儀

所異者樹路鼓及設歌鐘歌磬於廟堂上前

右校清掃內外前享一

日奉禮設御位於廟東陞東南南向

攝事御位下放此

設享官

公卿位於東門之內道南執事者皆位於其後每等異

位俱重行西向以北爲上

攝則公卿位於道北執事位於道南

設御史位

於廟堂之下一位於西南東向一位於東北西向令史

各陪其後設奉禮位於樂懸東北贊者二人在南差退

俱西面設協律郎位於廟堂之上前楹之間近西東向

設太樂令位於北懸之南北向設從享之官位九廟子

孫於享官公卿之南昭穆異位

雖有貴者以齒

文官九品以上

位於子孫之南東方南方朝集使於文官之南東方南

方蕃客又於其南俱每等異位重行西面北上介公鄼

公位於西門之內道南武官九品以上於介公鄩公之南少西當文官西方北方朝集使於武官之南西方北方蕃客又於其南俱每等異位重行東面北上

其褒聖侯於文

官三品之下諸州使人分方各位於朝集使之後

設門外位享官公卿以下皆

於東門之外道南每等異位重行北面西上子孫之位於享官公卿之東少南文官九品以上於子孫之東東方西方朝集使於文官之東東方南方蕃客又於其東俱每等異位重行北面西上設介公鄩公位於西門之

外道南武官九品以上於介公鄺公之西少南西方北方朝集使於武官之西西方北方蕃客又於其西俱每

等異位重行北面東上

其褒聖侯於文官三品之下諸州使人分方位於朝集使之後

攝無九廟子孫以下至此儀

設牲牐於東門之外當門西向以南爲

上設廩犧令位於牲西南史陪其後俱北向設太祝位於牲東各當牲後祝史各陪其後俱西向設太常卿省牲位於牲前近北又設御史位於太常卿之西俱南向設罇彝之位於廟堂上前楹間各於室戶之左北向春

夏每室雞彝一鳥彝一犧樽二象樽二山壘二秋冬每

室斚彝一黃彝一著樽二壺樽二山壘二皆加勺鬯凡

廟畧皆以黼皆西上各有站焉祫享設樽彝於廟堂上下每座斚彝一黃彝一犧樽二象

樽二著樽二山壘二在堂上皆於神座之左獻祖太祖高祖高宗樽彝在前楹間北向懿祖代祖太宗中宗睿宗樽彝在戶外南向其壺樽二大樽二山壘四在堂下階間北向西上祫享則雞彝鳥彝餘同祫享設簋

鉶籩豆之位於廟堂上俱東側階之北每座四簋居前

四簋次之次以六觶次以六鉶籩豆爲後每座異之祫禘

攝事簋簋鉶鉶皆以南爲上屈陳而下設御洗於東陞與正數半之

東南亞獻之洗又於東南俱北向壘水在洗東篚在洗

西南肆

篚實以珪
瓚巾爵

執罇壘篚罍者各位於罇壘篚罍之

後

於祫禘儀享日未明五刻太廟令服其服布昭穆之座
於戶外自西序以東皇八代祖獻祖宣帝皇六代祖

太祖景皇帝皇高祖高祖神堯皇帝皇祖高宗天皇大
帝座皆北廂南面皇七代祖懿祖光皇帝皇五代祖元

皇帝皇曾祖太宗文武聖皇帝皇帝皇伯考中宗孝和皇帝
皇考睿宗大聖真皇帝座於南廂北向每座皆設黼宸

莞席紛純藻席畫純
次席黼純左右几

省牲器

省牲之日午後十刻廟所禁斷行人太廟令整拂神幄

祝史各取毛血每座共實一豆祝史又洗肝於鬱鬯又

取脾膋共實一豆俱置饌所餘並如圜丘儀

脾膋腸間脂祫禘祝

史洗肝於鬱鬯並同圜丘儀

鑾駕出宮

前出宮三日本司宣攝內外各供其職守官設從享官

五品以上次於承天門東西朝堂如常儀前二日太樂

令設宮懸之樂於殿廷如常儀

駕出懸而不作

享日未明七刻

槌一鼓爲一嚴

三嚴時節前一

侍中奏開宮殿門及城

門餘並與圜丘儀同唯祭官稱享爲異耳

晨裸

享日未明四刻諸享官各服其服太廟令良醞令各帥

其屬入實罇壘

雞彝斚彝及犧罇壺罇之上罇皆實以明水山壘之上罇實以元酒烏斚黃斚

實以鬱鬯犧罇著罇實以醴齊象罇壺罇實以盎齊山壘實以清酒祫禘之罇斚彝及五齊上罇皆實明水山壘上罇實以元酒黃斚實以鬱鬯犧罇實以沈齊象罇實以醴齊著罇實以盎齊壺罇則實以醞齊太罇則實以沈齊山壘

實以清酒

太官令帥進饌者實諸籩豆簠簋未明三

刻奉禮帥贊引引御史博士太廟令史太祝宮闈令及

令史祝史與執罇壘篚幕者入自東門當階間重行北

面西向立定奉禮曰再拜贊者承傳

凡奉禮有詞贊者皆承傳

御史

以下皆再拜訖執罇壘篚幕者各就位贊引引御史詣

太祝詣東陞升堂行掃除於上令史祝史行掃除訖引

就位

上瑞爲前中下相次及伐國所得寶器上次先後

亦然俱藉以席攝事不陳瑞物寶器

未明二刻贊引引太廟令太祝宮闈

令詣東陞升堂詣獻祖室入開埽室太祝宮闈令奉出

神主置於座

裕禘則未明二刻陳腰與於東陞之東每室各二皆西面北上立定贊引引太廟令

太祝宮闈令帥內外執事者以腰輿自東陞升詣獻祖
室入開塹室太祝宮闈令奉出神主各置於輿出詣座
前奉神座訖以次奉出 訖引太廟令以下次奉出懿祖
懿祖以下如獻祖儀

次奉出太祖次奉出代祖次奉出高祖次奉出太宗次

奉出高宗次奉出中宗次奉出睿宗神主置於座如獻

祖之儀

皇祖妣以下神主皆宮闈令奉出俱並而虔右

訖引太廟令以下降還

本位

攝事贊引各引享官俱就門外位無駕將至下至從享官位儀也

駕將至謁者贊

引引享官通事舍人分引九廟子孫從享羣官諸方客

使先至者俱就門外位駕至大次門外迴輅南向將畢

降立於輅右侍中進當鑒駕前跪奏稱侍中臣某言請
降輅俛伏興還侍位皇帝降輅乘輿之大次繳扇華蓋
侍衛如常儀太廟令以祝版奉御署訖近臣奉出太廟
令受各奠於坵通事舍人引文武五品以上從享之官
皆就門外位太樂令帥工人二舞入就位文舞入陳於
懸內武舞立於懸南道西其升堂座者皆脫屣於下降納如常謁者引司
空入就位立定奉禮曰再拜司空再拜訖謁者引司空
詣東陞升堂行掃除於上降行樂懸於下訖引復位初

司空行樂懸通事舍人謁者贊引各引享官及九廟子

孫從享羣官諸方客使入就位

攝事無九廟子孫以下至皇帝再拜儀但享官

再拜

皇帝停大次半刻頃太常博士引太常卿立於大

次門外當門北向侍中版奏外辦皇帝出次華蓋侍衛

如常儀

侍中負寶陪從如式

博士引太常卿太常卿引皇帝

凡太常卿

前導皆博士先引

至廟門外殿中監進鎮珪皇帝執鎮珪華蓋

仗衛停於門外近侍者從入如常皇帝至版位西向立

每立定太常卿與博士退位於左

太常卿前奏稱請再拜退復位皇帝

再拜奉禮曰衆官再拜在位者皆再拜

其先拜者不拜

太常卿

前奏

攝事謁者進太尉之左白請行事凡攝事皆太尉初獻

有司謹具請行事退

復位協律郎跪俛伏舉麾

凡取物者皆跪俛伏而取以興奠物則奠訖俛伏而後興

鼓柷奏永和之樂乃以黃鍾爲宮大呂爲角太簇爲徵

應鍾爲羽作文德之舞樂舞九成

黃鍾三奏大呂太簇應鍾各再奏

偃

麾戛敔樂止

凡樂皆協律郎舉麾工鼓柷而後作偃麾戛敔而後止

太常卿前奏

稱請再拜退復位皇帝再拜奉禮曰衆官再拜在位者

皆再拜太常卿引皇帝詣罍洗太和之樂作

皇帝每行皆如常樂

皇帝至盥洗樂止侍中跪取匱興沃水又侍中跪取盤

興承水皇帝搢鎮珪

凡受物則搢珪奠訖執珪俛伏興

皇帝盥手黃門

侍郎跪取巾於篚興進皇帝悅手訖黃門侍郎受巾跪

奠於篚黃門侍郎又取瓚於篚興進皇帝受瓚侍中酌

盥水又侍中奉盤皇帝拭瓚訖侍中奠盤匱黃門侍郎

受巾奠於篚皆如常太常卿引皇帝樂作皇帝陞自阼

階樂止侍中中書令以下及左右侍衛量人從升

以下皆如

之攝事皆太尉升陛盥洗酌獻

太常卿引皇帝詣獻祖樽彝所執樽者

舉幕侍中贊酌鬱鬯訖登歌作肅和之樂以圜鍾之均

自後登歌皆歌圜鍾

太常卿引皇帝入詣獻祖神座前北向跪以

鬯裸地奠之俛伏興太常卿引皇帝出戶

祫禘少退攝事同

北

向再拜訖太常卿引皇帝次裸懿祖次裸太祖次裸代

祖次裸高祖次裸太宗次裸高宗次裸中宗次裸睿宗

並如上儀訖登歌止太常卿引皇帝樂作皇帝降自阼

階還版位西向立樂止初羣官拜訖祝史各奉毛血及

肝膋之豆於東門外齋郎奉爐炭蕭稷黍各立於肝膋

之後於登歌止祝史奉毛血肝膋與奉爐炭蕭稷黍者
以次入自正門升自太階諸太祝各迎取毛血肝膋於
階上俱入奠於神座前祝史退立於罇所齋郎奉爐炭
皆置於室戶外之左其蕭稷黍各置於爐炭下降自阼
階以出諸太祝俱取肝出戶燔於爐炭還罇所

饋食

皇帝既升裸太官令出帥進饋者奉饌陳於東門之外
重行西向以南爲上謁者引司徒出詣饌所司徒奉獻

祖之俎皇帝既至位樂止太官令引饌入自正門俎初

入門雍和之樂作以無射之均

自後按神之樂堂下皆奏無射

饌至太

階樂止祝史俱進徹血毛之豆降自阼階以出饌升諸

太祝迎引於階上各設於神前

籩豆盞畢先徹乃升籩簋既奠却其盞於下

設訖謁者引司徒以下降自阼階復位諸太祝各取蕭

稷黍濡於脂燔於爐炭還樽所太常卿引皇帝詣壘洗

樂作皇帝至壘洗樂止皇帝盥手洗爵侍中黃門侍郎

贊洗如晨裸之儀訖太常卿引皇帝樂作皇帝升自阼

階訖樂止太常卿引皇帝詣獻祖罇彝所執罇者舉罇
侍郎贊酌醴齊訖光大之舞作太常卿引皇帝入詣獻
祖神座前北向跪奠爵少東俛伏興太常卿又引皇帝
出取爵於坵酌醴齊訖太常卿又引入詣神座前北面
跪奠爵少西興太常卿引皇帝出戶北面立樂止
八節止諸座皆然太祝持版進於室戶外之右東面跪讀祝文

裕享樂終

曰維某年歲次月朔日子孝曾孫開元神武皇帝諱敢
昭告於獻祖宣皇帝

攝事云謹遣太尉封臣名下倣此

祖妣宣莊皇后

張氏氣序流邁時惟孟春

孟夏孟秋

永懷罔極伏增遠感謹

以一元大武柔毛剛鬣明粢薌萁嘉蔬嘉薦醴齊恭修

時享以申追慕尚饗讀訖興

以下諸室祝文儀並同裕禋祝云晷度環周歲序云

及永懷追慕伏增遠感謹以一元大武柔毛剛鬣明粢薌合薌萁嘉蔬嘉薦泛齊肅雍明獻恭備裕享餘字並

同禋享祝云祇薦禋事太祖以下並稱臣

皇帝再拜訖又再拜初讀祝文訖

樂作太祝入奠版於神座出還罇所皇帝拜訖樂止太

常卿引皇帝詣懿祖罇彝所執罇者舉罍

攝事太尉詣罇彝所取爵

於坵執罇者舉罍太尉酌醴齊他倣此

侍中取爵於坵進皇帝受爵侍中

贊酌醴齊訖長發之舞作太常卿引皇帝入詣懿祖神
座前北向跪奠爵少東俛伏興太常卿又引皇帝出取
爵於坫酌醴齊訖太常卿引皇帝入詣神座前北面跪
奠爵少西興太常卿引皇帝出戶北向立樂止太祝持
版進於戶之右東向跪讀祝文曰維某年歲次月朔日
子孝曾孫開元神武皇帝諱敢昭告於懿祖光皇帝祖
妣光懿皇后賈氏讀祝文訖奠版於神座出還罇所皇
帝拜訖樂止太常卿引皇帝詣太祖罇彝所如上儀大

政之舞作祝文曰孝曾孫開元神武皇帝臣諱敢昭告
於太祖景皇帝祖妣景烈皇后梁氏餘如上儀次代祖
大成之舞作祝文曰孝曾孫開元神武皇帝諱敢昭告
於代祖元皇帝祖妣元貞皇后獨孤氏獻訖太常卿引
皇帝詣罇彝所皇帝拜訖樂止太常卿引皇帝詣高祖
罇彝所如上儀大明之舞作祝文曰孝曾孫開元神武
皇帝臣諱敢昭告於皇高祖神堯皇帝祖妣大穆后竇
氏訖次太常卿引皇帝詣太宗罇所如上儀崇德之舞

作祝曰孝曾孫開元神武皇帝臣諱敢昭告於皇曾祖
太宗文武聖皇帝皇曾祖妣文德聖皇后長孫氏訖次
太常卿引皇帝詣高宗罇彝所如上儀鈞天之舞作祝
文曰孝孫開元神武皇帝臣諱敢昭告於皇祖考高宗
天皇大帝皇祖妣大聖天后武氏訖次太常卿引皇帝
詣中宗罇彝所如上儀酌醴齊文和之舞作祝文曰孝
姪開元神武皇帝臣諱敢昭告於皇伯考中宗孝和皇
帝和思皇后趙氏訖次太常卿引皇帝詣睿宗罇彝所

如上儀景雲之舞作祝文曰孝子開元神武皇帝臣諱
敢昭告於皇考睿宗大聖真皇帝皇妣昭成皇后竇氏
訖興皇帝再拜訖又再拜初讀祝文訖樂作太祝入奠
版於神座出還罇所皇帝拜訖曲終樂止太常卿引皇
帝詣東序西向立壽和之樂作皇帝獻將訖謁者引司
徒詣東階升立於楹間北面東上皇帝獻訖諸太祝各
以爵酌上罇福酒合置一爵一太祝持爵授侍中侍中
受北向進皇帝再拜受爵跪祭酒啐酒奠爵俛伏興諸

太祝各帥齋郎持俎進太祝減神座前三牲胙肉

各取前脚

第三

加於俎又於籩豆取稷黍還罇所以胙肉各置一

俎上以飯共置一籩以飯授司徒司徒奉進皇帝受以授左右太祝又以胙肉授司徒司徒授俎以次進皇帝每受以授左右謁者引司徒降復位皇帝跪取爵遂飲卒爵侍中進受虛爵以授太祝太祝受爵復於坵皇帝俛伏興再拜樂止太常卿引皇帝樂作皇帝降自阼階還版位西向立樂止文舞出鼓祝作舒和之樂出訖戛

敬樂止武舞入鼓祝作舒和之樂立定戛敬樂止初皇

帝將復位謁者引太尉升自阼階

攝事則太尉將復位謁者引太常以下倣

此詣獻祖罇彝所執罇者舉幕太尉酌盞齊武舞作謁

者引太尉入詣獻祖神座前北向跪奠爵少東興謁者

引太尉出戶北向再拜謁者又引太尉取爵於坫酌盞

齊訖謁者引入詣神座前北向跪奠爵少西訖興謁者

引太尉出戶北向再拜謁者引太尉次詣懿祖罇彝所

取爵於坫執罇者舉幕太尉酌盞齊謁者引太尉入詣

懿祖神座前北向跪奠爵少東興謁者引太尉出戶北
向再拜謁者又引太尉取爵於坩酌盞齊訖謁者引入
詣神座前北向跪奠爵少西訖興謁者引太尉出戶北
向再拜訖謁者引太尉次獻太祖次獻代祖次獻高祖
次獻太宗次獻高宗次獻中宗次獻睿宗並如上儀訖
謁者引太尉詣東序西向立諸太祝各以爵酌壘福酒
合置一爵一太祝持爵進太尉之左北向立太尉再拜
受爵跪祭酒遂飲卒爵太祝進受虛爵復於坩太尉興

再拜謁者引太尉降復位初太尉獻將畢謁者引光祿

卿攝事詣罍洗盥洗升酌盞齊終獻如亞獻之儀訖引

光祿卿降復位武舞止登歌作雍和之樂諸太祝各入

室徹豆還罇所

徹者邊豆各一少移於故處

登歌止奉禮曰賜胙贊

者唱衆官再拜在位者皆再拜

已飲福者不拜

永和之樂作太

常卿前奏稱請再拜退復位皇帝再拜奉禮曰衆官再

拜在位者皆再拜樂一成止太常卿前奏禮畢太常卿

引皇帝還大次樂作皇帝出門樂止殿中監受鎮珪華

蓋侍衛如常儀通事舍人謁者贊引各引享官及九廟子孫從享羣官諸方客使以次出贊引御史太祝以下俱復執事位立定奉禮曰再拜御史以下皆再拜贊引引出工人二舞以次出太廟令與太祝宮闈令納神主如常儀其祝版燔於齋坊

薦新於太廟儀

薦新之日太廟令帥齋郎灑掃廟之内外太官先饌所薦之物於神厨

若有酒者廟司設罇坩罌洗如式

謁者引太常卿入立

於門東之內道北面南謁者贊引稱再拜太常卿再拜

進饌者奉饌入自正門升自太階各詣於神座前

籩豆
蓋畢

徹之如式訖降自東階以出謁者引太常卿升自東階詣獻

祖室前盥洗酌獻訖再拜又再拜

若無酒卽
俱再拜

訖謁者引

太常卿復位謁者贊拜訖謁者引出

薦新物

冬魚蕨筍蒲白韭菹小豆胾豆襄荷菱仁薑菱索春酒
桑落酒竹根黃米粳米糯米梁米稷米茄子甘蔗芋子

鷄頭仁苜蓿蔓菁胡瓜冬瓜瓠子春魚水蘇枸杞芙茨
子藕大麥麵瓜油麻麥子椿頭蓮子栗冰柑子李櫻桃
杏林檎橘榘菴羅果棗兔脾麋鹿野雞凡薦新皆所司
白時新堪供進者先送太常令尚食相與簡擇仍以滋
味與新物相宜者配之以薦皆如上儀

梁太祖親饗廟二

開平三年正月二十二日
月三十日

其年十

後唐莊宗親饗廟一

同光二年正月二十九日

明宗親饗廟一

長興元年二月十九日

周太祖親饗廟一

廣順三年十二月二十九日

文獻通考卷第九十七

欽定四庫全書

文獻通考卷九十八

鄱陽馬端臨貴與著

宗廟考八

祭祀時享

宋制太廟歲以四五月及季冬凡五享朔望薦食薦新
三年一祫以孟冬五年一禘以孟夏

開寶初上親享太廟見所陳籩豆簠簋問曰此何物

也左右以禮器對上曰吾祖宗寧識亟命徹去進常膳如平生既而曰古禮不可廢也命復設之於是判太常寺和峴言按唐天寶中享太廟禮料外每室加常食一牙盤五代以來遂廢其禮今請如唐故事乃詔別設牙盤食禘祫時享皆用之

太宗端拱二年七月詔以今年八月二十四日親享太廟會有彗出東井詔罷其禮

仁宗慶歷時四孟臘時享太廟攝事用羊豕各二祈報

象罇一別廟增黃彝壺尊二親享則加犢

三年御史蔡稟言周制四時享親之禮有九今寺觀則車駕一歲再臨未嘗薦獻宗廟非奉先教民意帝謂輔臣曰三歲一祠郊廟而賚及天下若歲親行之則人有覲賞之心朕朝夕奉三聖御容於禁中未嘗敢怠也

太廟舊唯薦冰景祐二年趙良規請薦新如通禮宗正寺禮官參定正月韭菰卵二月冰三月筍含桃四月麥蕪五月瓜來禽六月菱芡七月栗櫟鷄棗梨八月酒稻

菱九月小豆蕎麥十月兔栗諸蕒十一月鴈麋十二月
魚增二十六種禮院因奏禮有薦新如朔奠自頃有司
言宗廟則后廟可兼遂上前廟帝主薦冰請后主奉慈
后廟四時薦新如朔望牙盤食例宗正寺官充攝行禮
詔可

神宗元豐三年詳定郊廟奉祀禮文所言祠禴烝嘗之
名春夏則物未成而祭薄秋冬則物盛而祭備故許慎
以品物少文詞多為祠而王弼以禴為祭之薄何休謂

祈穀成者非一黍先熟可得薦故曰嘗冬萬物畢成所
薦衆多故曰烝故禮記以嘗為大嘗周禮以烝為大烝
孔安國亦以烝嘗為大亨今太廟四時雖有薦新而孟
享禮料無祠禴烝嘗之別伏請春加韭卯夏加麥魚秋
加黍豚冬加稻鴈當饋熟之節薦於神主其籩豆於常
數之外別加時物之薦豐約各因其時以應古禮從之
又言薦血之器禮所不載唐崔沔議曰毛血盛於槃
宋書志南郊以二陶豆盛毛血開元開寶通禮及今

儀注皆以豆盛之禮以豆盛菹醢登盛羹其薦毛血
當以槃親享太廟但有三牲骨體俎而無腸胃膚俎
不應古義請於三牲骨體俎之外加以牛羊腸胃及
豕膚俎各一古者祭祀無迎神送神之禮其於祭之
末皆不拜按少牢饋食禮主人朝服即位於阼階東
西面鄭氏曰為將祭也即不言拜及祝告禮成主人
出立於阼階上西南亦不言拜近代事神拜而迎送
殊非禮意請改定儀注聖王之事宗廟禮如事生故

饌則薦四時之和氣與四海九州之美味貢則陳金
璧龜帛以明共天下之材其餘無常必致國之所有
以明遠物無不至自秦漢以來奉宗廟者不本先王
之經訓有司奉行充其位而已故天下常貢入王府
者未嘗陳於太廟良為濶略請親祠太廟並令戶部
陳歲貢以充庭實仍以龜為前金次之玉帛次之餘
居後 太常禮院言舊儀親祠太廟車駕未至大次
太祝宮闈令奉出帝后神主置於座行禮畢已還齋

殿方納神主今親祠皇帝至阼階太祝闌令始奉神主置於座行禮畢皇帝俟納神主然後降阼階舊八室帝主各以太祝遷納其后主止命太廟宮闌令二員恐致遲緩請權差七員同奉從之

詳定禮文所言古者宗廟九獻王及后各四諸臣一自漢以來為三獻后無入廟之事相循至今若時享則有事於室而無事於堂禘祫則有事於堂而無事於室室中神位不在奧堂上神位不當展有饋食而

無朝踐度今之宜以備古九獻之意請室中設神位
於奧東面堂上設神位於戶外之西南面皇帝立於
戶內西面裸鬯是為一獻出戶立於扆前北向行朝
踐薦腥之禮是為再獻皇帝立於戶內西南行饋食
薦熟之禮是為三獻詔並候廟制成取旨

又言王制祭宗廟之牛角握周禮小司徒凡小祭祀
奉牛牲天子之祭無不用牛者唐郊祀錄稱宗廟社
稷等祭悉用太牢今三年親祠而八室共用一犢及

祫享盛祭有司攝事而不用太牢則為非稱請三年
親祠并時享有司攝事太廟每室並用太牢詔親祠
并祫享每室用太牢

又言古者人君臨祭立於阼階者主階惟人君蒞之
行事示繼體祖考親親之義且以尊別於臣庶也今
朝享太廟設小次於殿下褥位之東西向設皇帝版
位於廟東階之東南南向乃是古者大夫士臨祭之
位殊失禮意請自今太廟行禮並設皇帝版位於東

階之上西向更不設殿下版位及小次又曾子問曰
斂幣玉藏諸兩階之間聘禮卷幣埋於西階東舊制
宗廟燔其幣未合於禮請凡禮神之幣皆埋之西階
東冊則藏諸有司之匱

五年詔自今太廟祠祭前廟初獻差親王宗室使相節
度使郡王后廟初獻宗室節度觀察留後觀察使歲以
序差不赴者罰之其餘祠祭勅差行事者准此

六年十一月帝親祠南郊前期三日奉仁宗英宗徽號

冊寶於太廟是日齋於大慶殿翼日薦享於景靈宮禮畢帝服通天冠絳紗袍乘玉輅至太廟宰臣百僚班迎於廟門侍中跪請降輅帝却乘輿步入廟趨至齋宮翼日帝服鞞袍至大次有司奏中嚴外辦禮儀使跪奏請行事帝服袞冕以出至東門外殿中監進大圭帝執以入宮架樂作升東階樂止登歌樂作至位樂止太祝宮闈令奉諸室神主於座禮儀使贊曰有司謹具請行事帝再拜詣壘洗登歌樂作降階樂止宮架樂作至南北

向樂止帝搢圭盥帨洗瓚拭瓚訖執圭宮架樂作升堂
樂止登歌樂作殿中監進鎮圭帝搢大圭執鎮圭詣僖
祖室樂止登歌奏瑞安之曲至神座前北向跪奠鎮圭
於纁藉執大圭跪三上香執瓚裸地奠瓚捧幣奠訖執
圭俛伏興出戶外北向再拜內侍舉鎮圭以授殿中監
至次室行事皆如前儀帝還位登歌樂作至位樂止宮
架興安之樂作文舞九成止禮部戶部尚書以次官奉
逐室俎豆宮架豐安樂作奠訖樂止帝再詣壘洗登歌

樂作降階樂止宮架樂作至洗南北向立樂止帝搢圭
盥帨洗爵拭爵訖執圭宮架樂作帝升東階樂止登歌
樂作至僖祖室樂止宮架樂作帝搢圭跪受爵祭酒三
奠爵執圭俛伏興出戶外北向立樂止太祝讀冊文帝
再拜詣次室皆如前儀帝還位登歌樂作至位樂止文
舞退武舞進宮架正安之樂作亞獻以次行事如前儀
樂止帝詣飲福位登歌樂作至位樂止宮架僖安樂作
帝再拜搢圭跪受爵祭酒三啐酒奠爵受俎奠俎受搏

黍稷黍豆再受爵飲福酒訖奠爵執圭俛伏興再拜樂止帝還位登歌樂作至位樂止太常博士徧祭七祀配享功臣戶部禮部尚書徹俎豆登歌豐安樂作徹訖樂止禮直官曰賜胙行事陪祠官皆再拜宮架興安樂作一成止太祝宮闈令奉神主入諸祔室禮儀使跪奏禮畢登歌樂作帝降階樂止宮架樂作出東門殿中監受大圭歸大次樂止有司奏解嚴轉仗赴南郊自元豐初命陳襄等詳定郊廟禮文至是始用新儀

七年詔舊制薦新米麥之屬皆取於市今後宜令玉津
瓊林宜春瑞聖諸園及金明池後苑供具其所無者乃
索之雜買務

詳定郊廟禮文所言古者薦新於廟之寢無尸不卜
日不出神主奠而不祭近時擇日而薦非也天子諸
侯物熟則薦不以孟仲季為限月令孟夏薦麥孟秋
薦黍季秋薦稻呂氏月令一歲之間八薦新物開元
禮加以五十餘品景祐中禮官建議以謂呂紀簡而

近薄唐令雜而不經於是更定四時所薦凡二十八物除依詩禮月令外又增多十有七品雖出於有司一時之議然歲時登薦新物自祖宗行之已久今欲稍加判定取其間先王所嘗享用膳饈之物見於經者可依舊制存之其不經者去之庶幾不失禮意請自今孟春薦韭以卵饈以葑仲春薦冰季春薦笋饈以含桃孟夏以彘嘗麥仲夏嘗雛以黍饈以瓜季夏以含桃孟秋嘗栗與稷饈以棗以梨仲秋嘗麻

嘗稻饁以蒲季秋嘗菽饁以兔以栗孟冬饁以鴈仲冬饁以麇季冬饁以魚今春不薦鮪實為闕典請季春薦鮪以應經義無則闕之如林檎蕎麥諸蔬之類及季秋嘗酒皆不經見宜刪而去之凡新物及時出者即日登獻既非正祭則於禮不當卜日漢儀嘗韭之屬皆於廟而不在寢故韋元成傳以為廟歲二十五祠而薦新在焉自漢至於隋唐因仍其失薦新雖在廟然皆不出神主今出神主則失禮尤甚請依韋

彤五禮精義但設神座仍俟廟成薦新於寢庶合典禮詔依所定如鮪魚闕即以魴鯉代之

八年太常寺言治平四年故事山陵前宗廟輟祭享遇朔望以內臣行薦食之禮俟祔廟畢仍舊今景靈宮神御殿已行上食太廟朔望薦食自當請罷從之

元祐七年太廟復用牙盤食舊制並於禮饌外設常食一牙盤元豐中罷之禮官呂希純嘗建議曰先王之於祭祀皆備上古中古及今世之食所設古器禮饌即上

古中古之食也牙盤常食即今世之食也而議者乃以爲宗廟牙盤原於秦漢陵寢上食殊不知三代以來自備古今之食請依祖宗舊制薦一牙盤及是始從希純之議云呂希純又嘗奏唐開元開寶禮每廟室薦獻帝后各奠一爵其后爵謂之副爵每堂室只奠一爵帝后共享慢神瀆禮莫此之甚請帝后各奠一爵亦如其儀焉

徽宗大觀四年議禮局言按太廟儀注春夏用犧罇象

罇秋冬用著罇壺罇各二已應周禮司罇彝之義又每
享各用大罇二則是以追享朝享之罇施之於禴祠烝
嘗矣其為失禮明甚請自今四時享太廟不用大罇禮
記郊特牲曰灌以圭璋用玉氣也周禮典瑞裸圭有瓚
以肆先王說者謂天地有禮神之玉而無鬱鬯宗廟有
鬱鬯而無禮神之玉然則宗廟之玉裸圭而已圭瓚之
制以圭為枋其長尺有二寸黃金為勺青金為外朱中
央其容五升其徑八寸其勺之鼻為龍首所以出鬱鬯

也其槃徑一尺所以承瓚也今親祀太廟以塗金銀瓚有司行事以銅瓚其大小長短之制皆不如禮請改製以應古制 十一月太常光祿寺言禮制局新定太廟陳設之儀盡依周制籩豆各用二十有六簠簋各八以籩二十有六為四行以右為上饎籩二為第一行朝事籩八次之饋食籩八又次之加籩八又次之豆二十有六為四行以左為上饎豆二為第一行朝事豆八次之饋食豆八又次之加豆八又次之簠八為二行在籩之

外簋八為二行在豆之外籩豆所實之物悉如周禮籩人醢人之制惟簋以稻梁簋以黍稷而茅苴以蓴蜆醢以蜂子代之 十二月禮制局言太廟祭器鉶用三登用一竊考鉶與登皆盛羹之器祭祀烹牲於鼎升肉於俎其涪芼以醢鹽蔬實之於鉶則謂之鉶羹不致五味實之於登則謂之太羹周官饗人祭祀共太羹鉶羹是也且宗廟之祭用太牢而三鉶實牛羊豕之羹固無可論者至於太羹止設一登以少牢饋食禮考之則少牢

者羊豕之牲也佐食饌兩鉶司士進湑二豆三牲之祭
鉶既設三則登亦如其數請太廟設三登實牛羊豕之
湑以為太羹明堂亦如之

政和四年比部員外郎何天衢言先王建祭祀之禮必
得疏數之中未聞一日並行兩祭者也今太廟薦新有
與朔祭同日者夫朔祭之禮行於一月之首不可易也
若夫薦新則未嘗卜日一月內皆可薦也新物未備猶
許次月薦之亦何必同朔祭之日哉詔薦新與朔祭同

日即用次日

高宗建炎二年上幸揚州行南郊禮時太廟神主奉於壽寧寺前一日上親詣寺行朝享謝禮禮成恭謝如儀時景靈宮神御奉安於温州乃差官詣温州行禮

三年上幸杭州太廟神主併奉安於温州祭享皆差官攝事以禮器未備五享權用酒脯行禮太廟朔祭每室例用一羊建炎初務省約初用酒脯紹興五年復用羊紹興七年上祀明堂於建康時有徽宗之喪先是太常

少卿吳表臣乞於大祀前二日朝獻景靈宮前一日朝
享太廟及是援熙寧元年故事謂是時英宗喪未除不
廢景靈宮太廟之禮請如故事翰林學士朱震以為不
然謂王制喪三年不祭唯天地社稷得越紼行事監察
御史趙渙言升祔以後宗廟常祭皆不當廢而當喪享
廟亦有顯據左氏傳曰烝嘗禘於廟曾子問曰已葬而
祭此不當廢也詩頌成王即位諸侯來助祭春秋文公
四年十一月成風薨六年十月猶朝於廟此顯據也疏

奏詔侍從臺諫議吏部尚書孫近等十五人言謹按春秋三十三年傳凡君薨卒哭而祔祔而作主特祀於寢烝嘗禘於廟杜預謂新主既特祀於寢則宗廟四時常祀自當如舊又按景德三年明德皇后之喪改易而服除真宗遂享太廟合祭天地於圜丘熙寧元年神宗居諒闇復用景德故事躬行郊廟之禮則是考古及今居喪得見宗廟將來明堂大禮已在以日易月服除之後前一日皇帝合詣太廟朝享從之

禮部太常寺言將來明堂大禮依已降旨前一日朝享太廟檢照景德熙豐南郊故事皆在諒闇之中當時親行郊禮除郊廟景靈宮合用樂外所有鹵簿鼓吹及樓前宮架諸軍音樂皆備而不作其逐處巡警場止鳴金鉦鼓角而已今臣僚欲議罷宗祀奏樂受胙故事即無去奏樂受胙之文兼祖宗故事三載大饗明堂蓋亦為民祈福奏樂受胙合依祖宗累朝已行故事從之

先是監察御史趙渙言春秋有事於武宮叔弓卒去

樂卒事以卿佐之喪而猶去樂况天王后之喪而可用備樂乎載祀既殯既葬而祭五祀則尸入三飯不脩不酢以五祀之祭猶廢脩酢况宗廟之祭而可享受福釐乎故晉制國有大喪天地明堂皆去聲樂且不受胙有唐祭日遇忌亦備樂而不奏此皆得禮之體也陛下雖在喪服而猶宗祀者用王制之言不敢以卑廢尊也今唯聲樂受胙於未安者蓋拜跪受釐既爲嘉慶之事而虞祔既畢則廟加先帝之坐陛下

薦裸饋奠進詣徽室必將想像平生悲哀感愴而乃金石絲竹雜然並奏豈不違神靈之至意而傷陛下之孝心哉將來明堂大禮前一日乞依列聖故事躬詣宗廟行朝享之禮其奏樂受胙二事乞寢庶合禮有旨令本部太常寺討論故事

紹興三十二年六月

時孝宗已即位

禮部太常寺言皇帝登極

擇日詣太廟行朝享之禮參酌紹興十三年親享禮例牲牢禮料酒齊等並如每歲五享施行從之

淳熙十六年二月光宗受禪詔以四月六日親享太廟

紹熙五年閏十月

時寧宗已即位

浙東提舉李大性言竊觀紹

興七年侍從臺諫禮官詳定明堂典禮其大略云居喪皆得見宗廟近者合宮展祀陛下止詣明堂殿然臣之愚竊謂與淳熙十五年事體不同又况漢文以來皆即位而謁廟陛下龍飛已三越月未嘗一至宗廟行禮鑒興屢出過太廟門不入揆之人情似爲闕典乞與二三大臣議之早行擇日恭謝太廟少見祇肅宗廟之意於

是詔遵用三年之制其朝謁太廟委有妨礙

明年吏部員外郎李謙言事莫重於登極禮莫急於告廟蓋即位必告廟示敬親也告廟必於歲首大其事也舜正月上日受命於文祖禹正月朔旦受命於神宗皆行告廟之禮也然禮以變而或殊事隨時而亦異有不可以一例觀者議禮之家各持一說不致其辯禮意無自而明夫嘉禮之與凶禮不可以並行舉一必廢一故在禮經喪三年不祭唯祭天地社稷

爲越紼而行事蓋不敢以卑而廢尊也夫天地以尊而不廢宗廟以親豈獨可廢乎况王制三年不祭之說諸儒之論亦自不同杜預之說以爲既祔以後宗廟得四時常祭蓋杜氏之意不以三年不祭宗廟爲是也今姑置常祭之說而論即位踰年告廟之禮庶幾禮簡而易明虛言無證則論不定請質事以明之且太甲之元祀十有二月乙丑伊尹奉嗣王祇見厥祖百官猶總已以聽冢宰則是太甲居仲壬之喪而

告廟也漢呂后以八年七月即世九月大臣迎立代
王元年十月辛亥文帝即祚謁高廟即是文帝居呂
后之喪而告廟也唐代宗以大歷十四年即世德宗
建中元年正月庚午朝享於太廟其後穆宗長慶之
元年敬宗寶歷之元年武宗會昌之元年懿宗咸通
之元年皆以正月朝享於太廟徧觀歷代之制雖小
節不同大槩居喪雖權住祭踰年正月必告於廟載
諸經史可考而知漢昭宣元成哀平六世皆以即位

謁廟不待踰年則失之速唐太宗貞觀三年正月方
事於太廟馬周得以爲言則失之緩皆非禮之正也
以歷代之事而求其當其惟踰年正月告廟乎恭惟
陛下自登極以來已享帝矣大行梓宮發引在即來
年正月盍行告廟之禮禮官未見申明者豈非以王
制爲據乎竊謂即位之後已曾謁廟國有大故故可
以未祭與居喪之後即位未經謁廟者事體不同考
歷代已行之事宜於來年正月一日陛下躬行告廟

之禮庶幾立一王之制示萬世之規乞下禮官指定施行詔令禮部太常寺討論聞奏至是禮寺看詳乞俟皇帝從吉日討論典禮施行從之

禮部太常寺修立郊祀大禮前一日朝享太廟行禮儀注

陳設

前享三日儀鑾司設大次於太廟東神門外道北南向小次於阼階東稍南西向又設文武侍臣次於大次之

前行事助祭官宗室及有司次於廟之内外設東方南

方客使次於文官之後西方北方客使次於武官之後

各隨地之宜設饌幔於南神門外

每室饌幔各一

又設七祀次

於殿下橫街之北道西東向又設配享功臣次於殿下

橫街之南東西相向

每室功臣配享各爲一次

前享二日宮闈令帥

其屬掃除廟之内外開瘞坎於殿西階之東南方深取

足容物南出陞太常設七祀燎柴於南神門外光祿牽

牲詣所太常陳登歌之樂於殿上前楹間稍南北向設

宮架於庭中立舞表於鄼綴之間戶部陳諸州歲貢於
宮架之南神門外隨地之宜東西相向前享一日奉禮
郎禮直官設皇帝位版於阼階上飲福位於東序俱西
向贊者設亞終獻位於小次南稍東助祭親王宗室使
相在其南進幣爵酒官受爵酒官奉幣官薦牛俎官薦
羊俎官實鑊水官薦豕俎官增沃鑊水官受幣官盥洗
奉爵官奉瓚槃官進搏黍官舉冊官七祀獻官在助祭
宗室使相之南並西向北上大禮使位於西階之西稍

南

與亞終
獻相對

行事光祿卿讀冊官光祿丞功臣南官在其

西

太常光祿以
下皆稍却

執事官位於其後助祭宰相使相位在

大禮使之南執政官在其西又設監察御史位二於西
階下俱東向北上奉禮郎太祝太官令於東階下西向
北上協律郎位二一於殿上磬簾西北一於宮架西北
俱東向押樂太常丞於登歌樂簾北押樂太常卿宮架
之北北向良醞令位於罇彝所俱北向薦香燈官宮闈
令於室內北向西上又設助祭文武羣臣宗室位於橫

街之南東西相向諸方客位廟門之外隨其方國光祿
陳牲於東神門外當門西向以南爲上祝史各位於牲
後太常設省牲位於牲西大禮使進幣爵酒官受爵酒
官奉幣官受幣官盥洗奉爵官奉瓚槃官位於道南北
向西上七祀配享功臣獻官在其後監察御史二位在
西東向薦牛俎官眡滌濯官實鑊水官眡腥熟節官增
沃鑊水官押樂太常卿光祿卿讀冊舉冊官太常丞光
祿丞奉禮協律郎太祝太官宮闈令位在東西向北上

禮部帥其屬設祝冊案於室戶外之右司罇彝帥其屬設幣篚於酌罇所次設籩豆簋簋之位每室左二十有六籩右二十有六豆俱爲四行俎三二在籩前一在豆前又設俎九在豆右爲三重登一在籩豆間鉶三皆有柶在登前簋八簋八在籩豆外三俎間簋在左簋在右設爐炭於室戶外蕭蒿稷黍於其後又設毛血盤肝膋豆於室戶外之左稍前設罇彝之位每室罇彝一黃彝一皆有舟著罇二壺罇二皆疊加勺冪爲酌罇太罇二

山罇二犧罇二皆有壘加勺加冪設而不酌俱北向西

上太常設七祀位於殿下橫街之北次內

司命戶竈中雷門厲行

又設配享功臣位於橫街之南次內

韓王趙普濟陽王曹彬位於橫街之

南道西東向太師薛居正太師石熙載鄭王潘美位在

其西太師李沆太師王旦太師李繼隆位又在其西太

師王曾呂夷簡侍中曹瑋位又於其西又設司徒韓琦

太師曾公亮位於橫街之南道東西向太師富弼位在

其東太師司馬光位又在其東太

師韓忠彥位又在其東俱北上

皆設神席太廟設神

位版於座首司罇彝設祭器每左二籩右二豆俎一在

籩豆前簋一簋一在俎前簋在左籩在右爵一次之象

罇一在籩前加冪又設俎三於南神門外每室饌幔內

設進盤匝帨巾內侍位於皇帝版位之後分左右奉盤

者北向奉匝及執巾者南向又設亞終獻盥洗爵洗於

其位之北

盥洗在東
爵洗在西

壘在洗東加勺篚在洗西南肆實

以巾若爵洗之篚則又實以爵太官令盥洗於西階下

七祀配享功臣獻官盥洗各於神位之前

七祀及配享
功臣位前盥

洗各

壘勺篚巾各設於左右執壘篚者位其後享日未

行事前宮闈令開室帥其屬整拂神幄如常儀司罇彝

入設祭器太府卿帥其屬入陳幣於筐

幣以白

光祿卿帥

其屬入實籩豆簋簠籩四行以右爲上第一行饅餌在

前粉飡次之第二行醴在前蕡白黑形鹽臠鮑魚鱠次

之第三行乾棗在前濕棗栗濕桃乾桃濕梅乾榛榛實

又次之第四行菱在前芡臬鹿脯次之豆四行以左爲

上第一行醢食在前糝食次之第二行韭菹在前醢醢

昌本麋鸛菁菹鹿鸛茆菹麋鸛又次之第三行葵菹在

前羸醢脾析鹿醢蜃蜆醢豚拍魚醢又次之第四行芹

菹在前兔醢深蒲醢醢落菹鴈醢筍菹魚醢又次之簋

實以稻梁梁在稻前簋實以黍稷稷在黍前登實以太

羹鉶實以和羹芼滑太官令帥其屬入實俎

籩前之俎爲二重以

北爲上第一重實以牛羊七體兩髀兩脅并脊而兩髀
在兩端兩肩兩脅次之脊在中第二重實以羊腥七體
其載如牛豆前之俎實以豕腥七體其載如羊豆右之
俎九爲三重以北爲上第一重實以牛羊豕首各一第
二重實以牛腥腸胃肺離在上端刳肺三次之腸三胃
三又次之一實以羊腥腸胃肺其載如牛一實以豕腥
膚九橫載第三重一實以牛熟腸胃肺一實以羊熟腸
胃肺一實以豕熟膚其載如腥皆牛在左羊在中豕在
右良醢令帥其屬入實彝及樽壘竿彝實以明水黃彝

實以鬱鬯

著樽二一實以元酒一實醴齊皇帝酌之壺樽二一實元酒一實盎齊亞終獻酌之太樽

二一實泛齊一實醴齊山樽二一實盎齊一實醴齊犧樽二一實沈齊一實事酒象樽二一實昔酒一實清酒

並設而不酌

凡罍之實各視其樽

又實七祀及配享功臣位禮饌

每位左二籩卓在前鹿脯次之右二豆菁菹在前鹿醵次之俎實以羊豕腥肉簋實以稷簋實以黍爵一象樽一實以清酒太常設燭於神位前設大禮使以下行事執事

官揖位於東神門外如省牲之位設望瘞位於瘞坎之南如省饌之位儀鑾司設冊幄於南神門外隨地之宜前朝享一日學士院以祝冊授通進司進御書訖降赴

尚書禮部

車駕詣太廟

前享一日皇帝於景靈宮朝獻畢既還大次禮部郎中奏解嚴訖皇帝入齋殿文武侍祠行事執事助祭之官

非從駕者

宗室先詣太廟祠所其日禮直官宣贊舍人引禮

部侍郎詣大次前奏請中嚴少頃又奏外辦皇帝服履袍自齋殿詣大次出行門禁衛諸班親從等諸司祇應人員以下迎駕奏聖躬萬福次知客省事以下樞密都

承旨以下知內侍省以下帶御器械官應奉祇應通侍大夫以下武功大夫以下及幹辦庫務文臣一班迎駕奏聖躬萬福俟皇帝即御座從駕宰執使相一班次管軍臣寮並奏聖躬萬福皇帝乘輿出景靈宮櫺星門將至太廟御史臺太常寺閣門分引文武侍祠行事執事助祭之官宗室於太廟櫺星門外立橫班再拜奏迎訖退皇帝乘輿入櫺星門至大次降輿以入簾降侍衛如常儀宣贊舍人承旨敕羣臣及還次

省牲器

是日未後二刻宮闈令帥其屬掃除廟之內外司鐸彝帥執事者以祭器入設於位凡祭器皆藉以席又加巾蓋太府卿入陳幣於篚

告潔畢權徹

未後三刻禮直官贊者

分引大禮使以下並服常服詣東神門外省牲位光祿卿丞與執事者牽牲就位禮直官贊揖贊者引押樂太

常卿入行樂架

凡亞終獻行事皆禮直官太常博士引大禮使執政官及中眠滌濯官受爵酒

官進爵官行事皆禮直官引餘官皆贊者引次引眠滌濯官及升自西階眠滌濯凡行事執事官升降皆自西

階內應奉官并執事隨應奉人各隨應奉階升降

次引申視滌濯官申視滌濯

執事者皆舉簾曰潔俱退復位禮直官稍前曰告潔畢請省牲前引省牲官稍前省牲訖退復位次引光祿卿出班巡牲一匝西向躬曰充曰備次引光祿丞出班巡牲一匝西向躬曰膾俱復位禮直官稍前曰省牲訖請就省饌位揖訖引大禮使以下各就位禮直官贊揖有司省饌俱畢禮直官贊省牲畢揖訖俱還齋所光祿卿丞及執事者以次牽牲詣厨授太官令次引省鼎鑊官

詣厨省鼎鑊視濯漑次引實鑊水官詣厨實鑊水次引
增沃鑊水官詣厨增沃鑊水協律郎展視樂器乃還齋
所晡後一刻太官令帥宰人以鸞刀割牲祝史各取毛
血實於槃又取腓臂實於登俱置饌所遂烹牲宮闈令
帥其屬掃除廟之內外

晨裸

享日丑前五刻

行時用丑
時十刻

宮闈令開室帥其屬掃除禮

部奠冊於案太府卿入陳幣光祿卿入實籩豆簋簋太

官令入實俎良醢令入實彝及罇壘樂工帥工人二舞
以次入與執罇壘篚簠者各就位執事官各入就位次
御史臺太常寺閤門宣贊舍人分引文武助祭官及宗
室客使贊者引薦羊俎官以下宗室各入就位禮直官
贊者分引大禮使以下行事執事官詣廟東門外揖位
立禮直官贊揖訖先引監察御史按視殿之上下糾察
不如儀者降階就位次引大禮使以下各入就位皇帝
服通天冠絳紗袍至大次禮儀使樞密院官太常卿閤

門官太常博士禮直官分立於大次外之左右引禮部侍郎詣次前奏請中嚴少頃又奏外辦符寶郎奉寶陳於宮架之側隨地之宜禮儀使當次前俛伏跪奏禮儀使臣某言請皇帝行事奏請俛伏興還侍立

禮儀使奏祀儀准此

簾捲皇帝服袞冕以出侍衛如常儀禮儀使以下前尊

至東神門外殿中監跪進大圭禮儀使奏請執大圭前

導皇帝入自正門

侍御不應入者止於門外

協律郎跪俛伏舉麾興

工鼓祝宮架乾安之樂作

皇帝升降行止皆奏乾安之樂

至阼階下偃

麾戛敔樂止升自阼階大禮使從

凡樂皆協律郎跪俛伏舉麾興工鼓祝而

後作偃麾戛敔而後止升自阼階皇帝升降大禮使皆從左右侍衛之官量人數從升

登歌樂作

樂止禮儀使以下分左右侍立

凡行禮禮儀使樞密院官太常卿閤門官太常

博士禮直官前導至位則分立於左右

次引奉瓚官升詣僖祖室神位前

西向立奉瓚樂官升詣皇帝版位前奉瓚槃北向立次

引奉神主官詣皇帝版位前俛伏跪奏奉神主奏訖俛

伏興退祠祭官於殿上承傳曰奉神主次引薦香燈官

搢笏於祔室內奉帝尊主設於座

奉神主詣神幄內於几後啓匱設於座及

以白羅巾覆之
執笏退復位

次引宮闈令奉后神主如上儀

以青羅巾覆之

退復位次引奏奉神主官詣皇帝版位前伏跪奏奉神
主訖奏訖俛伏興退禮儀使前奏有司謹具請行事又
奏請再拜皇帝再拜贊曰再拜在位官皆再拜訖次內
侍各執槃匱帨巾以進宮架樂作禮儀使奏請皇帝搯
大圭盥手內侍進槃匱沃水皇帝盥手又奏請帨手內
侍進巾皇帝帨手訖又奏請皇帝洗瓚奉瓚槃匱官進瓚
內侍沃水皇帝洗瓚又奏請拭瓚內侍進巾皇帝拭瓚

訖樂止又奏請執大主奉瓚槃官奉瓚槃詣僖祖室蹲
爨所西向立以瓚涇鬯執爨者舉冪良醢令酌鬱鬯訖
先詣次室蹲爨所北向立禮儀使前導登歌樂作皇帝
入詣祖室北向立樂止禮儀使奏請搢大主跪奉瓚槃
官奉瓚槃西向以瓚授奉瓚官奉瓚官西向跪以進禮
儀使奏請執瓚皇帝執瓚以鬯裸地奠瓚奉瓚官受瓚
以授奉瓚槃官奉瓚槃官以槃受瓚訖俱詣次室以俟
禮儀使奏請執大主俛伏興前導皇帝出戶外北向立

又奏請再拜皇帝再拜訖禮儀使前導皇帝詣翼祖室
次詣宣祖室次詣太祖室次詣太宗室次詣真宗室次
詣仁宗室次詣英宗室次詣神宗室次詣哲宗室次詣
徽宗室裸鬯並如上儀奉瓚官奉瓚樂官俱降復位良
醢令還罇所禮儀使前導皇帝還版位登歌樂作至位
西向立樂止宮架作興安之樂文德之舞九成止太官
令取肝以鸞刀制之洗於鬱鬯貫之以腎燎於爐炭薦
香燈官以肝腎入詔神於室又出以隳祭於室戶之左

三祭於茅苴俱降詣盟洗位盟手帨手升復執事位

饋饌

享日有司陳鼎三十有三於神厨各在鑊右太官令帥

進饌者詣厨以匕升牛於鑊實於一鼎

肩膊臑肫脰正脊一直脊一橫

脊一長脊一短脊一代脊一背二骨以正

次升羊如牛升豕如羊各實於一

鼎每室牛豕各一鼎

皆設扃冪祝史對舉入設於每室饌幔內

次引視腥熟節官詣饌所視腥熟之節俟皇帝晨裸畢

還位樂止祝史抽扃委於鼎右除冪加匕畢於鼎太官

令以七升牛載於一俎

肩臂臠在上端肫脰在下端脊脅在中

次升羊豕

各載於俎其載如牛

每室牛羊豕各一俎

次引薦牛薦羊薦豕俎

官搢笏奉俎以入太官令引入正門官架豐安之樂作

由宮架東至橫街折方進行陳於西階下北向北上薦

俎官搢笏奉俎以升執事者各迎於階薦官奉俎詣僖

祖室神位前北向跪奠先薦牛次薦羊次薦豕各執笏

俛伏興有司設牛羊豕俎於腸胃膚之前

牛在左羊在右豕在右

詣次室奉奠並如上儀樂止俱降復位

內執官降西側階出西神門入

南門歸
執事班

次引薦香燈官取蕭合黍稷擣於脂燎於爐炭

又當饋熟之時取苴擣於醢祭於豆間三又取黍稷肺
祭如初藉用茅各還蹲所次引奉幣官進幣官受幣官
受爵酒官進爵酒官升詣僖祖室奉幣官進幣官受爵
酒官進爵酒官在東西向北上受幣官在西東向次引
奉爵酒官升殿詣皇帝版位前奉爵北向立內侍各執
盤匱帨巾以進宮架樂作禮儀使奏請皇帝搢大圭盟
手內侍進槃匱沃水皇帝盥手又奏請帨手內侍進巾

皇帝悅手訖又奏請皇帝洗爵奉爵酒官進爵內侍沃
水皇帝洗爵又奏請拭爵內侍進巾皇帝拭爵訖樂止
又奏請執大圭奉爵酒官受爵奉受爵詣僖祖室酌罇
所西向立執罇者舉冪良醞令酌著罇之醴齊訖先詣
次室酌罇所北向立禮儀使前導登歌樂作殿中監進
跪進鎮圭禮儀使奏請搢大圭執鎮圭前導皇帝入詣

僖祖室樂止宮架作基命之樂

翼祖室大順之樂宣祖
室天立之樂太祖室皇

武之樂太宗室大定之樂真宗室熙大之樂仁宗室義
成之樂英宗室治隆之樂神宗室大明之樂哲宗室重

光之樂徽宗
室承元之樂

文舞作內侍先設纁藉於地禮儀使奏請

跪奠鎮圭於纁藉執大圭俛伏興又奏請搢大圭跪次

內侍跪取幣於篚以授奉幣官奉幣官授進幣官進幣

官西向跪以進禮儀使奏請受幣皇帝受奠訖受幣官

東向跪受以興進奠於僖祖神位前次奉爵官以爵授

受爵酒官受爵酒官授進爵酒官進爵酒官西向跪以

進禮儀使奏請執爵皇帝執爵祭酒

三祭於
茅道

奠爵受爵

官以爵復於坫禮儀使奏請執大圭俛伏興前導皇帝

出戶外北向又奏請少立樂止奉幣官進幣官受幣官
奉爵酒官受爵酒官進爵酒官俱詣次室內侍舉鎮圭
授殿中監又以纁藉詣次室先設於地次舉冊官搢笏
跪舉祝冊讀祝官搢笏東向跪讀冊文讀訖奠冊各執
笏興先詣次室戶外東向立禮儀使奏請再拜皇帝再
拜訖禮儀使前導皇帝詣每室奠圭幣酌獻並如上儀
次奉幣官進幣官受幣官奉爵酒官受爵酒官進爵酒
官俱降復位內侍舉鎮圭纁藉以鎮圭授殿中監以授

有司讀冊官以下俱降復位禮儀使前導皇帝還版位
登歌樂作至位西向立樂止禮儀使奏請還小次登歌
樂作前導皇帝降自阼階樂止宮架樂作將至小次禮
儀使奏請釋大圭殿中監跪受大圭皇帝入小次簾降
樂止文舞退武舞進宮架正安之樂作舞者立定樂止

亞終獻

禮直官太常博士引亞獻詣盥洗位北向立搢笏盥手
執笏詣爵洗位北向立搢笏洗爵拭手以爵授執事者

執笏升詣僖祖室酌罇所西向立宮架作正安之樂武功之舞執事者以爵授亞獻亞獻搢笏跪執爵執罇者舉冪太官令酌壺罇之盎齊訖先詣次室酌罇所北向立亞獻以爵授執事者執笏興入詣僖祖室神御前北向立搢笏跪執事者以爵授亞獻亞獻執爵祭酒三祭於茅苴奠爵執笏俛伏興出戶外北向再拜次詣每室酌獻並如上儀樂止降復位初亞獻行禮將畢禮直官太常博士引終獻詣洗及升殿酌獻並如亞獻之儀降

復位初終獻既升次引七祀及配享功臣獻官詣盥洗
位搢笏盟手帨手執笏詣神位前搢笏跪執爵三祭酒
奠酌執笏俛伏興再拜詣次位並如上儀退復位唯七祀先

詣司命立奠爵訖興少立次引太祝進諸
位前北向跪讀祝文訖退獻官再拜復位

皇帝飲福

初皇帝既晨裸光祿以牛左臂一骨及長脅短脅俱二
骨以並載於胙俎升設於僖祖室戶外俟終獻既升獻
次引進俎官搏黍太祝太官令詣飲福位北向立奉俎

豆爵酒者各立於其後禮儀使奏請詣飲福位簾捲出
次宮架樂作殿中監跪進大主禮儀使奏請執大主前
導皇帝至阼階下樂止升自阼階登歌樂作將至飲福
位樂止登歌僖安之樂作皇帝至飲福位西向立尚醞
奉御執罇詣酌罇所良醞令酌上罇福酒合置一罇尚
醞奉御奉罇詣飲福位殿中監奉爵尚醞奉御酌福酒
殿中監北向捧以立禮儀使奏請再拜皇帝再拜殿中
監跪以爵酒進禮儀使奏請搢大主跪受爵祭酒

三祭
於地

啐酒奠爵殿中監跪受爵以興太祝帥執事者持胙俎
進減神位前正脊二骨橫脊加於俎上內侍受俎以授
進俎官進俎官南向跪以進皇帝受俎奠之進俎官受
俎以興以授內侍退詣殿上稍西東向立太官令取黍
於簋搏以授搏黍太祝太祝受以豆北向跪以進皇帝
受訖奠之搏黍太祝受豆以興降復位次殿中監再跪
以爵酒進禮儀使奏請再受爵飲福酒奠爵殿中監受
虛爵興以授奉御執事者俱降復位禮儀使奏請執大

圭俛伏興又奏請再拜皇帝再拜樂止禮儀使前導皇

帝還版位登歌樂作至版位西向立樂止次引徹牛俎

官徹

籩豆及俎籩豆俎各一但少移故處

登歌豐安之樂作卒徹樂止徹

牛俎官降復位禮直官曰賜胙行事助祭官拜贊者承

傳曰賜胙再拜在位官皆再拜送神宮架興安之樂作

一成止

神主入室

次引奏奉神主官詣皇帝版位前俛伏跪奏奉神主入

室奏訖俛伏興退祠祭官於殿上承傳曰奉神主入室

次引薦香燈官搢笏奉帝主入右室訖

薦香燈官先捧匱於神座納神

主於匱訖捧入祔室

執笏退復位次引宮闈令奉后主如上儀退

復位次引奏神主官詣皇帝版位前俛伏跪奏奉神主

入室訖俛伏興退禮儀使奏禮畢前導皇帝降自阼階

登歌樂作至阼階下樂止宮架樂作出門樂止禮儀使

奏請釋大圭殿中監跪受大圭以授有司皇帝還大次

禮部郎中奏請解嚴訖皇帝入齋殿宮闈令以黍稷肺

祭藉用白茅束而埋之於西階東有司各取幣置於坎
大禮使以下就望瘞位禮直官曰可瘞寘土半坎太廟
宮闈令監視次引大禮使以下詣東神門外揖位立禮
官贊禮畢揖訖退文武助祭官及宗室以次出次引
一祀獻官詣南神門外七祀望燎位南向立有司置祝
版於燎柴焚訖退太官令帥其屬徹禮饌監察御史詣
殿監視收徹訖宮闈令闔戶以降乃退太常藏祝冊於
匱

文獻通考卷九十八